

Epesas

Pol Epesas bin bi kirop mij ñu kil tikak

1 ¹Yad Pol. God yip ag lek, Krajs Jisas minim dad ameb bi alap midil, nibep God bin bi ne taun kib Epesas midebim okok, mij nibaul ñu kil tikebin.

²God Bapi cin abe, Bi Kib Jisas Krajs abe, nibep yimig niñil di tep ger, nibi mid tep ginimib.

Krais eip midobin ak, ne kaun cinop tap tep ñib

³Bi Kib cin Jisas Krajs Nap ne God nop tep agin. Ñi ne nop ag yokek apil cinop dek me, nop cig gon, seb kab ar alaŋ tap tep tep mideb okok magilsek kaun cinop ñib. ⁴Karip lim birarik ped okok ma gi lak ñin ak God agak, “Krais bin bi ne midenigal okok, kiri bin bi siŋ, bin bi asiŋ ma mideb yad okok midenigal,” agak.

Nib ak, birarik ped okok God bin bi midmagil lil, ⁵ñin nibak nep, gos ne nep niñil agak, “Ñi yad Jisas Krajs bin bi kirop dinigab okok, ñi pai yad ke rek lel, yad ke kirop dil yimagilnigain,” agak. ⁶Nib agil, Ñi midmagil ne ak abramek ag yokek apil, cinop di Nap ñinmagil ar ne lak ak me, tep gek niñlig gi yib ne ak agon ar amnaŋ.

⁷Jisas Krajs lakañ ne yapek kimil cinop tau adik dek, God, Bi tep yib ak, cinop yimig yib niñil, tap si tap timel gipin okok niñil kirig gip. Nib ak, cin nipin God ne bin bi okok mapin yib niñip. ⁸God ne gos niñ kid yikil tap magilsek okok niñip ak, cinop tap tep tep nib okok abramek ñib. ⁹Pen God ne Krajs eip tari ginig gak ak, tap we gil midoligip nibak cinop misenŋ agek nipin. ¹⁰God ñin kisen ag lak ñin ak, tap seb kab ar alaŋ siŋak abe, tap lim dai wagin aul abe, Krajs ne nokim nep magilsek kod midenigab.

¹¹God ne ke gos niñil ag lak ak, magilsek ginig geb. God ne ke gos niñil ag lak, cin Krajs cig gipin bin bi okok, bin bi ne ke linigabin. God

ne birarik ped okok niğ gos niñak. ¹²Ne gak nibak, cin bin bi Krajs nop ned niñ dinok okok, God yib ne agon ar amniniñ, ağıl gak. ¹³Pen nibi ak rek nep, Krajs minim tep bin bi di komiñ yokep minim niñid nibak niñ dem, God nibep dil, Kaun Siñ nibep nab adañ lil, Krajs bin bi ne yib ag lip. ¹⁴God Kaun cinop nab adañ mideb ak me, cin niñin, God tap tep tep bin bi yad kisen ñiniğain agak tap okok, kisen dil mid tep yib giniğabin. Nib ak, God yib ne agon ar amnañ.

Pol God nop sobok gak

¹⁵Nib ak, yad ned niñnek, nibi Bi Kib Jisas nop niñ dil, bin bi ne okok kirop midmagil lipim ak, ¹⁶yad saköl ma gil, per nep nibep nen ağıl, God nop tep giğ ağıl, sobok gilig gi midebin. ¹⁷Bi Kib cin Jisas Krajs God ne ak, Bapi tep akniğ ke ak, nop per ag niñil agebin, ne Kaun nibep ñiniğab niñil ne nibep gos tep ñil, God ne tigeğ bi rek mideb ak nibep yomek, nibi God nop niñ tep giniğabim. ¹⁸God nop sobok gil agebin, ne midmagil nibep nab adañ melik ne ñi lek, Krajs bin bi ne kirop tap tep akniğ ke ñiniğ geb ak niñniğabim. God tap tep nibak ñiniğain, ağıl me, nibep sik agak. ¹⁹God nop sobok gil agebin, ne midmagil nibep nab adañ melik ne ñi lek, ne Bi kilis akniğ ke yib gek, cin bin bi Krajs minim tep niñ dipin okok kilis nibak diñin rek lip ak niñniğabim. Kilis nibak God ñinmagil ar ne nep mideb. ²⁰Krajs piş nep kimek, God kilis nibak nep Krajs warik ñil, seb kab ar alağ siñak dam ñinmagil yipid piş kid ne lak. ²¹Krajs God eip am bişig giğ ak, kaun seb kab alağ ned kod mideliğipal okok abe, kaun seb kab alağ kisen kod mideniğal okok abe, yib kiri magilsek piyak midek, Krajs yib ne ak i ar alağ midek niñliğ gi, magilsek mok ne okok mideb. ²²God ne bin bi okok tap okok magilsek Krajs mok ne okok lak. Pen cin Krajs bin bi ne okok magilsek, God Krajs nop bi nabic ak ag lak. ²³Krajs bin bi ne okok, cin miğ goğ ne midobin. Krajs nabic abe miğ goğ abe mideb me ak.

Krajs nep gek, cin komiñ midobin

2 ¹Nibi tap si tap timel göliğipim ak, nibi bin bi piş nep kimal rek mideliğipim. ²Bin bi kariğ lim ar wağin aul tap si tap timel giğal rek, nibi ke ned ak rek nep göliğipim. Niñ nibak kaun kimi nab alağ midebal bi kib kiri giğ rek, nibi ned ak rek nep göliğipim. Kaun nibak ne bin bi God Minim ma niñ dipal okok kirop nab adañ mideb. ³Pen ned cin magilsek nibak rek nep goliğipin. Gos cin ke niñoliğipin rek gilig gi, gos ognap ke niñin rek ma lek, tap si tap timel nep goliğipin. Nib ak, bin bi okok gi timel gel God kirop pen yur kib ñiniğ geb rek ak, cin ak rek nep goliğipin.

⁴⁻⁵Nib ak, cin bin bi piş nep kimal rek midonok, God eip midoğin rek ma lek, God bin bi per nep yimiğ niñip ak, cinop midmagil yib lil, Krajs

eip di komiņ lip. God ne nibep yimig niņip ak me, nibep di komiņ yokip. ⁶God cinop Kraiis eip warik ñil, seb kab ar alaņ siņak dam Kraiis Jisas eip bisig gi ñak.

⁷Pen God gak nibak, bin bi kisen tik donigal okok, kiri God ne cinop nen agil, Kraiis Jisas nop ag yokil cinop gi tep yib gak ak niņil, God ne bi tep ke yib, bin bi yimig yib niņip ak niņnimel agil gak. ⁸God nibep yimig niņil di komiņ yokip. Kraiis minim tep ak niņ dipek ak me, ne nig gak. Pen nibi Kraiis niņ dem nibep dip ak, kilis cin ke gon cinop dip, agil ma agnimib. God ne nep nibep tap tep ak yokop ñib. ⁹Nibi Kraiis niņ dem nibep dip ak, nibi tap tep alap ma gipek. Nib ak, yib nibi ke agem ar amniņiņ rek ma lip. ¹⁰Pen God cinop dil Kraiis Jisas bin bi ne gi lak ak, God birarik ped okok bin bi okok kirop gi tep ginimel agil, cinop nig gak.

Kraiis Juda bin bi okok eip, Juda bin bi mer okok eip di jim ñak

¹¹Nibi nipim, nanim nap kiri Juda bin bi mer, niņil nibep tik dolak ak, nibi ak rek nep Juda bin bi mer. Juda bin bi okok yib kiri ke agil, “wak tikip” agoligipal. Bi okok kiri miņ goņ nig gipal. Pen nibep Juda bin bi mer okok yib agil, “wak ma tikip” agoligipal. ¹²Pen sakol ma ginimib. Nibi ned Kraiis pis ken ma midebek; nibi Isrel wagin ak mis ken midebek; God minim niņid ag lak ak ma nipek; nibi kariņ lim ar wagin aul mideligipim ak pen God nop ma niņeligipim. ¹³Nibi ned God mideb par siņak mideligipim pen miņi Kraiis lakañ ne yowak ak me, Kraiis Jisas eip God mideb siņak ulep opim. ¹⁴Nib ak, Kraiis ne kimak rek, cin Juda bin bi okok, Juda bin bi mer okok milik kabiam niņil pen pen goligipin wari nab ak tib wal gi yokil, wagin omal di jim ñil lek, cin wagin nokim alap nep midobin. ¹⁵Jisas miņ goņ lil kimak rek, Juda lo minim ke ke okok magilsek pis nep kir gak. Jisas kimak ak, kisen Juda bin bi okok wagin ak ke, Juda bin bi mer okok wagin ak ke midil pen pen ma ginigal; bin bi magilsek okok wagin nokim alap nep midil kapkap midenigal, agil kimak. ¹⁶Jisas miņ goņ ne mab kros bak alaņ kimak ak, wagin omal nib okok di God eip jim ñak; pen pen gep nag ak abe ñag pak lak. ¹⁷Ned ke ke yib midoligipin ak pen Kraiis minim tep God eip jim ñil midep ak damil, nibi bin bi par kib okok rek mideligipim okok ag ñil, cin Juda bin bi ulep okok midoligipin okok ag ñil gak. ¹⁸Kraiis kijon cinop ar nokim yikak nibak, God Kaun ne nokim mideb ak nep gek, cin wagin omalgil Bapi mideb siņak amjin rek lip.

Cin Kraiis pis ar midobin okok, God kariņ ne rek midobin

¹⁹Nib ak, miņi bin bi kariņ lim ke okok nib ju apil midebal rek ma midebim. Bin bi ar okok gi ajpal rek ma midebim. God bin bi ne ned nib okok eip mogim gil, bin bi ne yipid gil midebim. ²⁰Nib ak, cin God sobok gep kariņ ak rek midobin. Kraiis Jisas kariņ sap di midep kib nab eyaņ

mideb. Bi Jisas minim dad ameb okok abe, bi God minim agep okok abe, karip sap sikol sikol auan okok piñil lipal rek ak midebal; karip bog ñag kis kis gipal rek ak nibi midebim. ²¹Krais Jisas karip sap kib nab eyañ midek, karip nibak magilsek jim ñil kib gil, Bi Kib sobok gep karip siñ ne linigab. ²²Ñib ak, nibi Epesas bin bi Krais pis ar midebim okok, God ne nibep ak rek nep di karip nibak eip di jim ñil lek, karip ñilik migan tep ne ak God Kaun amil midenigab.

Pol Krais minim tep ak Juda bin bi mer okok kirop ag ñoligip

3 ¹Yad Pol, Krais nop wög gi ñilig gi, nibep Juda bin bi mer okok ag ñi ajen, bin bi ognap yip niñel milik yapek miñ lel midebin. ²Pen nibi bir nipim, God yip yimig niñil minim tep ne yip ag ñek, yad minim tep nibak nibep ag ñi ajöligipin. ³God yip yimig niñil, minim ne ned we gil midoligip ognap yip yomek niñnek ak, minim ognap ñu kil tikpin. ⁴Nibi minim ñu kil tikebin aul niñ tep gil me, God birarik ped okok Krais kisen ginigab ag lak minim ak niñil, yad minim ned we gil midoligip nibak niñ tep gipin ak, niñigabim. ⁵God Kaun ne cinop bi Jisas minim tep dad ameb bi ne ke okok abe, bi God minim agep bi ne ke okok abe miseñ agil gos ñek, minim bin bi ned ma niñeligipal ak nipin. ⁶Minim we gil midoligip nibak nig gil mideb: Juda bin bi okok abe, Juda bin bi mer okok abe, God tap tep bin bi ñinigain agak ak ñinigal. Kiri wagin omal miñ goñ nokim nep midek, God ne Krais Jisas ag yokil bin bi kirop gi rep ginigain agak minim tep nibak minim kiri magilsek. Krais Jisas minim tep ak me ak.

⁷God Bi kilis yib ak yip yimig niñil di tep gil, tap tep ke ñil, yip Krais minim tep ak wög gi ñeb bi alap ag lek midebin. ⁸God bin bi ne ognap bin bi kib, ognap bin bi sikol. Yad bi sikol yib ak pen God yip yimig niñil gi tep gek, Juda bin bi mer okok kirop, Krais cinop gi tep yib gil di tep yib gip, minim tep ak ag ñibin. Pen minim nibak dai ma juip. ⁹Pen God ne karip lim ar wagin aul mideb tap okok, tap seb kab ar alañ mideb tap okok magilsek gi lak ak, ne ke nep gek minim nibak we gil midoligip. Pen miñi God yip ag lek, yad minim we gil midoligip nibak bin bi magilsek okok kirop miseñ ag ñebin. ¹⁰God gak nibak, miñi Krais bin bi ne karip lim ar wagin aul midebal okok genigal niñlig gi, ejol seb kab ar alañ kod midebal okok, God bi gos niñ kid yik niñip ak niñnimel, agil gak. ¹¹God gak nibak, ne birarik ped okok gos niñak rek nep, Bi Kib cin Krais Jisas nop ag yokil, tap nibak gak. ¹²Cin Krais Jisas nop niñ dil cig gipin ak me, God nop ma pirikil, gos sek nep ne mideb ulep siñak amnin. ¹³Ñib ak, nibep ag ñi ajen, yip gi timel gel, koslam midebin ak, gos par ma niñnimib; yad koslam midebin pen God nibep tap tep ñinigab.

Krais bin bi kirop midmagil yib lip

¹⁴Ar nibak nep yad Bapi nop kogim yimil sobok gebin. ¹⁵Bapi ne ke gi lek, yakam lim dai ar wagin aul midebal okok abe, yakam seb kab ar

alaŋ siŋak midebal okok abe, cin magilsek yakam ne midobin. ¹⁶Bapi God nop sobok gebin, ne Bi melik tep ke sek, ñinmagil ne tap tep yib mideb niŋil ne Kaun ne nibep ñek, cibur gos midmagil nab nibep adaŋ kilis sek mideniŋabim. ¹⁷Bapi God nop sobok gebin, nibi Kraiis nop niŋ dem, Kraiis midmagil nab nibep adaŋ mideniŋab. Yad sobok gebin, nibi tap tari ginig gebim ak, God abe bin bi okok abe kirop midmagil lil ginigabim. ¹⁸Yad sobok gebin, nibi abe Kraiis bin bi magilsek okok abe, Kraiis ne per nep bin bi kirop midmagil yib lip ak miseŋ niŋniŋabim. ¹⁹Kraiis bin bi okok midmagil yib lip ak niŋniŋabim. Pen ar nibak nep mer. Yad God nop sobok gebin ak, ne nibep midmagil yib lip ak, cibur gos midmagil nab nibi ke adaŋ niŋniŋabim. Nib ak, God ne ke nab nibep adaŋ ap ran jakniŋab.

²⁰Cin God nop ag nipin, pen ne ag nipin rek nep ma ginigab; cin gos nipin rek nep ma ginigab. Kilis ne ke ak cinop nab adaŋ wög gil, ne gi yimeb nep ginigab. ²¹Nib ak, cin Kraiis Jisas bin bi ne midil nop cig midobin okok, yib ne per nep per nep ag dad amon ar amnaŋ! Nib akniŋ rek tep.

Kraiis miŋ goŋ ne jim ñil mideniŋmiŋ

4 ¹Yad Bi Kib wög gen yip miŋ lel midebin ak, minim agebin aul niŋniŋmiŋ. God nibep bin bi tep yad mideniŋmiŋ agil dip ak, nibi nib akniŋ rek nep gi mideniŋmiŋ. ²Bin bi kib midobin agil kabiam ma junimiŋ; bin bi sain tep okok mideniŋmiŋ. Nibi pen pen minim sisain agil midmagil linimiŋ. ³God Kaun nibep di jim ñil lek, jim ñil midebim rek, nig gil nep kapkap midojin agil gem amniŋiŋ. ⁴Cin Kraiis bin bi ne miŋ goŋ nokim alap nep mideb. Kaun ak nokim alap nep mideb. Nibi magilsek tap tep nokim alap nep kisen diniŋabin agil gos sek midebim. God tap tep nibak ñiniŋain agil nibep sik agak. ⁵Bi Kib cin ak nokim alap nep mideb. Kraiis nop niŋ dep kanib ak nokim alap nep mideb. Niŋ pakep ak nokim alap nep mideb. ⁶Bin bi magilsek midebal okok kiri God nokim alap nep, Bapi nokim alap nep mideb. Ne bin bi magilsek okok Bi Kib mideb. Ne bin bi ag lek, kiri magilsek wög ne giŋal. Ne bin bi magilsek okok nab kirop adaŋ mideb. ⁷Pen Kraiis cinop nokim nokim ke ke tap tep ke alap nonim li ñek dipin.

⁸Nib ak, God Minim ak ñu kil tikil aglak,

“Kariŋ lim ar alaŋ amnak ñin ak,

kauil mauil ne okok miŋ lil,

kirop dam lip gi dad amil,

bin bi okok kirop tap tep tep ñak,” aglak.

⁹Ne kariŋ lim ar alaŋ amnak aglak wagin ak titi gil rek mideb? Me ne ned lim dai yipil mok eyaŋ amil, kisen kariŋ lim ar alaŋ amnak. ¹⁰Nib ak cin nipin, bi lim dai yipil mok eyaŋ amnak ak, bi nibak nep ar alaŋ amil

seb kab ar alañ şınak amnak. Niğ gak ak, karip lim mok eyañ şınak abe, karip lim ar alañ şınak abe, karip lim magilsek yib amnigain, agil, niğ gak.

¹¹Bi nibak nep bin bi ne tap tep tep ñil, oğnap ag lek, Jisas minim tep dad ameb wög ak gıpal; oğnap God minim agep wög ak gıpal; oğnap bin bi Kraıs nop ma nıpal okok kırop Kraıs minim tep ak ag ñibal; oğnap bin bi Kraıs nop niğ dipal okok kırop kod midil ag ñi tep gıpal; oğnap bin bi ñi pai okok kırop Kraıs minim tep ak ag ñibal. ¹²God bin bi ne nop wög gel, Kraıs miş goğ ne kib gil kilis linimiğ, agil, bin bi ne okok kırop tap tep tep nib okok ñib. ¹³Kraıs miş goğ kilis lek, cin magilsek miş goğ nokim alap rek minim tep ne niğ dil, God Ñi ne tıgep Bi rek mideb ak niğ tep gil, cin ñi pai sikol rek mer, bin bi pobığ Kraıs ne ke mideb rek linıgabin.

¹⁴Niğ genıgab ak, kisen cin ñi pai sikol rek ma midonıgabin. Ñin kisen nibak, bi God Minim agobin, agil, minim ke ke okok nib okok nib di di tom tom apal okok, cinop yigen dil ñiğ solwara di adik madik gıp rek ma ginıgal. ¹⁵Ñin kisen nibak, cin bin bi okok kırop midmagil lil minim niğid nep agil, tap tari tari ginıgabin ak, Nabic tari gıpkop ak niğil, nib akniş rek nep gin. Nabic ak me Kraıs nep. ¹⁶Kraıs nabic midek, miş goğ kid ke oğnap kid ke oğnap pen pen midmagil lil, wög ke ke gel, kidil amil miş goğ kid ke ke di jim ñek, miş goğ magilsek kib gil, kilis linıgab.

Kraıs bin bi ne midobın rek, nag kisen nib ar ak gin

¹⁷Niş ak, yad Bi Kib minim ne ak dil nibep minim kilis agil agebin: bin bi God ma niğ dipal okok gıpal rek nag ar ak rek ma ginimiş. Bin bi nib okok gos kiri ma mideb. ¹⁸Kiri kislım piş şınak midebal. Kiri gos alap ma mideb yib. Gos timid midmagil kiri ke gac gil minim ma nıpal. Niş ak, God komığ ne kırop nab adağ ma mideb. ¹⁹Tap si tap timel tari tari gıpal okok kırop nabiğ ma gıp. Niş ak, kiri tap si tap timel abramek gi dam dam, miñi tap si tap timel kisen nib oğnap gin, agil, tapin nep abramek gel ameb.

²⁰Pen ned Kraıs minim tep ak ag ñon niğ dipek ak, Kraıs niş nag ar nibak ginimiş agıp, nibep ag ñon ma nipek. ²¹Nibep Jisas minim niğid ak nep ag ñon nipek ak me. ²²Tap si tap timel ned göliğıpım ak, gos timid midmagil nibep gac ginıgab. Niş ak, tap si tap timel göliğıpım ak piş nep kirıg ginimiş. ²³Gos tep kisen nib ar ak nep niğnişimib.

²⁴Pen God gek niş bin bi kisen niş midenişimib rek lip. Niş ak, nag kisen nib ar ak tiğ ulek lil, God komığ tep mideb rek ak, God ne şığ ke mideb rek ak midenişimib.

²⁵Niş ak, cin magilsek Kraıs miş goğ ne nokim nep midobın ak me, niş magilsek bin bi okok kırop esek apım ak kirıg gil, minim niğid nep agnişimib. ²⁶Ñin oğnap bin bi nibep gi timel gel nibep mişik yonıgab. Pen

milik yapek, tap si tap timel ma ginimib. Niğ gil milik niñlig gi midem niñlig gi, piñ pañid ma amniñiñ. ²⁷Mer ak, Seten nibep gos timel ñek, tap si tap timel ginimib rek lip.

²⁸Bin bi tap si dipal okok kisen tap si ma dinimel; kilis kiri ke wög gil tap midek niñlig gi, ognap bin bi yim gep rek okok kirop ñinimel. ²⁹Minim agniğ ginimib ak, minim timel ognap ma agnimib. Minim tep, bin bi niñil God nop cig tep ginimel rek linimiñ minim ak rek nep agnimib. ³⁰God ñin kisen ak cinop pis nep dinigain agil niñ lil, Kaun Siñ ne ak ned ag yokek apil nibep nab adañ mideb ak me, timel gil God Kaun Siñ nop miker ma ñinimib. ³¹Cibur timel gek, bin bi ognap niñem milik yapek, kabiam juil, minim pen pen agil, bin bi ag juil, gi timel gil gipim ak magilsek kirig ginimib. ³²Pen pen yimiğ niñil, midmagil linimib. Nibi Krai pis ar midem, God nibep tap si tap timel gipim ak niñil kirig gip rek ak, nibi ak rek nep pen pen niñil kirig ginimib.

Melik ar ak nep tagojin

5 ¹Nibi God ñi pai midmagil tep ne midebim ak, ne gip rek ginimib. ²Krais ne cinop bin bi midmagil lil, God nop tap dap sobok gel ki tep owip rek ak, cinop nen agil mab bak alañ kimak. Krais gak nibak niñil, nibi ke, nib akniñ rek nep bin bi okok kirop midmagil lilig gi midenimib.

³Pen God bin bi ne ke yib midebim ak, bin si bi si gil, okok ajil abramek gil, tap tep kiri okok yad dipnep agil, nag ar nibak rek magilsek pis nep kirig ginimib. ⁴Wasikil agil, ñiloñ lil, minim timel agil ma ginimib. Minim nibak rek ma agep yib. Nibi pen God nop tep agnimib.

⁵Niñ tep ginimib: bin si bi si gipal bin bi okok abe, okok ajil abramek gipal bin bi okok abe, tap tep kiri okok yad dipnep apal bin bi okok abe, kiri God Krai apil mal kariñ lim seb kab ar alañ kod midebir siñak ma amniğal yib. Kiri tap si tap timel nib okok gos nipal ak, tap nib okok god kiri rek lip.

⁶Nag timel agesin nib okok, bin bi ognap nibep tom agil agniğal, “Tap nib okok tap si tap timel mer,” agniğal. Nibep esek agel niñnimib rek lip ak, niñ tep gil minim kirop ma dinimib. Tap si tap timel agesin nib okok gem, God kal juil nibep gi timel yib ginigab. ⁷Minim kiri niñil kirop eip ma ajenimib.

⁸Ned kislim nab okok mideligipim ak pen miñi Bi Kib bin bi ne lil melik ne ar ak midebim. Miñi melik ne ar ak midebim rek, bin bi melik ar ak ajpal rek ajenimib. Melik ñi pai rek midenimib. ⁹Melik magil ak tap tep tep koñai nep piñigab: gi tep gep magil ke ke koñai yib piñigab; tap tari tari God niñek tep ginigab tap okok magilsek piñigab; tap tari tari niñid nep mideb per nep piñigab. ¹⁰God nop tep ginimiñ ar ak nep niñ tep gil gem amniñiñ.

¹¹Kislim eyañ ajil tap si tap timel gipal ak nibi eip ma ginimib. Tap si tap timel gipal ak melik ar ak agem niñnimel. ¹²Kiri tap si tap timel we gil gipal ak, cin tap nib okok minim nep agnigabin ak, nabiñ ginigab. ¹³Karip tikek magilsek miserñ nipin. Nib ak rek, God melik ne apek, tap tari we gil gipal ak miserñ niñnigal. ¹⁴Melik apek, magilsek nipin. Ar nibak nep, bin bi ognap apal,

“Nak kimil mideban ak, miñi warikek,

Krais melik ne ak nep melik pak ñinigab,” apal.

¹⁵Nib ak, bin bi ognap minim ma niñil abramek gipal rek ma ginimib. Niñ tep gilig gi midenimib. ¹⁶Bin bi tap si tap timel nep gipal ñin nibaul, nibi per nep niñ tep gil gi tep ginimib. ¹⁷Nib ak, bi badi rek ma ginimib; Bi Kib nop tep ginigab ar ak nep niñil ginimib. ¹⁸Ñig wain ñibem, saköl ma ñagnimiñ; kanib nibak amnigabim yap paknigabim. Pen, God Kaun apil cinop nab adañ ap ran jaknimiñ, agil, God nop sobok genigabim ak tep. ¹⁹God Minim dai Sam okok ognap pen pen aglig gi, Krais minim tep ak kimep ognap pen pen aglig gi, Bi Kib yib nop dap raneb kimep ognap pen pen aglig gi ginimib. Tep gek niñlig gi, midmagil nibi nab adañ kimep ognap Bi Kib nop agnimib. ²⁰Bi Kib cin Jisas Krais bin bi ne midobin ak me, tap tari tari ginimiñ, nibi per nep tap magilsek okok Bapi God nop tep aglig gi midenimib.

²¹Krais Bi Kib cin mideb apim ak me, ai mam Krais bin bi ne midebim okok pen pen di tep ginimib. Ai mam alap minim ognap agonimiñ ak, minim ne dinimib.

Bi ber gon

²²Nibi bin okok, Bi Kib minim niñil kisen gipim rek, bi nagimil sikop agenimel rek niñil kisen ginimib. ²³Ar nibak nig gil mideb: Krais bin bi ne okok miñ goñ ne ke mideb; ne ke nabic mideb. Krais bin bi ne di komiñ yokip. Krais bin bi dil nabic mideb rek, bi okok bin kiri dil nabic midebal. ²⁴Krais bin bi ne okok kirop agek minim ne kisen gipal rek, bin okok, bi kiri okok agnimel rek magilsek kisen ginimel.

²⁵Pen nibi bi okok, Krais bin bi ne okok midmagil lil kimak rek niñil, bin nibi okok ak rek nep midmagil yib linimib. ²⁶⁻²⁷Krais bin bi ne okok midmagil lil kimak ak, ne ke cöc ne ak nop minim ne ag ñil, ñig lil, ulik malik gi tep gil, cöc melik sek, gac sikol alap, tap timel sikol alap, minim sikol alap mer yib, cöc siñ nep, ne dil nop ke ñinigab. ²⁸Nib aknib rek nep, nibi bi okok bin nibi okok kirop midmagil linimib. Miñ goñ nibi ke gi tep gipim rek, bin nibi okok ak rek nep gi tep ginimib. Bi bin ne midmagil lip ak, ne ke midmagil lip. ²⁹Miñ goñ cin ke ak miñik kal ma nipin; ke niñon tep gek, tap magil ñilig gi ñilig gi kod mid tep yib nep gipin. Nib aknib rek nep, Krais bin bi ne kod mideb. ³⁰Tari ginig: cin Krais miñ goñ ñin kid tob kid ne okok rek midobin.

³¹Pen God Minim ak ñu kil tikil aglak, “Bi alap bin dinig, nonim nap kirop kirig gil, bin dil jim ñil midil, mib goŋ nokim rek lek midebir,” aglak. ³²Minim nibak wagin alap mideb pen kiri ned ma niŋeligipal. Yad gos niŋin minim nibak Kraiŋ abe bin bi ne okok abe ageb. ³³Pen nibi bi okok magilsek, mib goŋ nibi ke midmagil lipim rek, bin nibi okok kirop ak rek nep midmagil linimib. Nibi bin okok magilsek, bi nagimil sikop minim kirop dinimib.

Ñi pai okok; nonim nap okok

6 ¹Nibi ñi pai okok, Bi Kib kisen gipim rek, nanim nap minim agnimir rek dinimib. Nag tep me ar nibak. ²God minim aknib wajrem alaŋ agak ak agil agak, “Nanim nap sikop kirop di tep gil, agnimir rek ginimib,” agak. Pen God minim nibak nep agil minim alap sek agil agak, “Nibi aknib genigabim, yad nibep tap tep alap ñinigain,” agak. ³God agak, “Niŋ genigabim ak, kasek ma kimnigabim; lim dai ar wagin aul milek par midil, mid tep ginigabim,” agak.

⁴Pen nap sikop, ñi pai nibi okok mid tep gilaŋ, agil, kirop yo sij rimel niŋeb rek minim ak rek ma agnimib. Nib agem, ñi pai nibi okok yo sij rimel niŋil, minim agnigabim rek ma niŋnigal. Pen ñi pai nibi okok kib gel niŋlig gi, nibi nap sikop God Minim ag ñi tep gil, nag tep ar nibak ag yom ñilig gi midenimib.

Bi miñ wög gipal okok; bi kib kirop kod midebal okok

⁵Pen nibi bin bi, bi kib nibep mani tau dap lel kirop miñ wög gi ñibim okok, Kraiŋ minim agek, pirikil di tep gipim rek, bi kib nibi lim dai ar wagin aul okok minim agenigal, nibi ak rek nep pirikil kisen gil di tep ginimib.

⁶Bi kib okok niŋ midel niŋlig gi, wög gi tep gon, kirop tep gaŋ agil gos nibak nep ma niŋnimib; Kraiŋ nop miñ wög gipkep rek, God nop tep gaŋ agil, per wög gi tep ginimib. ⁷Bin bi lim dai ar wagin aul kirop nep wög gobin agil ma niŋnimib; Bi Kib ak nop wög gobin agil, tep gek niŋlig gi wög ginimib. ⁸Nibi niŋim, bin bi miñ wög gipal okok abe, bin bi gos kiri ke niŋil wög gipal okok abe, Bi Kib wög kirop niŋil, wög gi tep genigal ak kirop ak rek nep pen ñinigab.

⁹Pen nibi bi kib midil, bin bi cinop miñ wög gilaŋ agil, mani tau dap lipim okok, kirop gi tep ginimib. Minim kilis agem piriklig gi wög ma ginimel. Bi Kib seb kab ar alaŋ mideb ak, ne bin bi miñ wög gipal Bi Kib kiri abe, bin bi kirop kod midebal Bi Kib kiri abe mideb. Bi Kib ne bin bi okok kib, bin bi okok sikol, agil ma niŋip; udiŋ yirik ne ak adip adip midebal niŋil ne gol alap aka gol alap ma amnigab.

Cim kadiŋ God cinop ñib ak magilsek di tol gi midon

¹⁰Minim ag dai junig gebin aul niŋ tep ginimib. Bi Kib nop cig gem, ne kilis ne nibep ñinimij. ¹¹Seten cinop per gi timel ginig geb ak, cim

kadiņ God cinop ñib ak magilsek di tol gil, kanib tam siņak uliņin li mid tep ģinimib. ¹²Bin bi miņ goņ lakaņ mideb okok eip pen pen ma gobin. Kijeki kiyob ñilik tap timel okok bi kib kiri wagiņ ke ke seb kab alaņ kod midil, kislim eyaņ tapal okok eip pen pen gobin. ¹³Ñib ak, cim kadiņ God cinop ñib ak magilsek di tol ģi tep gil midem me, ñin koslam midep ak apek, kilis gil nep midem, tap ognap nibep ģinimel rek ma linigab. ¹⁴Ñib ak, God Minim niņid ak, sib nag rek piņ li tep ģinimib. Abik ñagnigal, aģil, per nep yipid gil gep nag ar ak, sior kilis lipal rek, di pabil bak nibi ak linimib. ¹⁵Tob tirip lipal rek, God eip ģim ñil midep minim tep ak dad amnimib. Bin bi ognap kirop minim tep nibak ag ñinig per ģi jin ģi midil, gos nibak nep niņil tob tirip rek linimib. ¹⁶Kadiņ teņid ñapal rek, God cinop kod mideniģab, aģil, nop gos niņ dilig ģi nep midem me, ne gek Bi Timel Gep kinalik ne mab rek yinek niņlig ģi ñagnigab okok piņ nep soņ ģinigab. Gos nibak nep niņil, kadiņ rek teņid ģinimib. ¹⁷Usajiļ kilis bad lipal rek, God nibep yimig niņil di komiņ yokip gos ak, di nabic ar alaņ usajiļ bad rek linimib. Tu par kid dad ambal rek, God Kaun tu par kid nibep ñib ak tu par kid rek dad amnimib. God Kaun tu par kid ak God Minim ne me. ¹⁸Kaun ne gos ñek niņlig ģi, God nop minim ar ke ke ag niņlig ģi mideniģib. Gos sek midil, bin bi Kraiņ piņ ar midebal okok magilsek God nop per nep sobok ģilig ģi mideniģib. ¹⁹Yip ak rek nep God nop sobok gem, yip kod midil, minim magil ne ke yip ñek niņlig ģi, yad ma piņkil, Kraiņ minim tep ned ma niņeligipal bin bi okok kirop abramek ag ñinim. ²⁰Yad Kraiņ bi ne midil, minim tep ne nibak ag ñi tagen yip miņ lel midebin ak pen God nop sobok gem yad ma piņkil abramek ag ñinim. Yad ak rek nep ģinim ak tep.

Minim dai won ognap

²¹Pen yad titi ģil rek midebin ak, wög tari tari gebin ak, mam tep cin Ticikas, bi God nop per nep wög ģi tep ģip ak, amjakiļ nibep magilsek ag ñinigab. ²²Cin titi ģil rek midobin ak, Ticikas amiļ aģek niņil gos sek mideniģib, aģil, nop midebiņ siņak ag yokebin.

²³Bapi God Bi Kib Jisaiņ Kraiņ apil mal nibep kod mider niņlig ģi, God Minim niņ di kilis ģilig ģi midil, ai mam okok eip kapkap midil, pen pen midmagil liļig ģi mideniģib. ²⁴Bi Kib cin Jisaiņ Kraiņ nop midmagil liļig ģi nep midebiņ okok, God nibep magilsek yimig niņil di tep yib ģinimib.